



22. oktober 2025

UPA2025/161

Tuluit oqaasii allamiut oqaasiini sallahsatut atuutsinneqariartornissaannut, aammalu danskit oqaasii atuartitsinermini oqaatsit pinngitsooranilu atuartitsissutissatut atorunnaarsinneqariartornissaannut Naalakkersuisut iliuusissanik pilersaarusiornissamut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Jens NapätôK, Naleraq)

Siullermik Siumut sinnerlugu siunnersuuteqartumut inatsisartuni ilaasortaq Jens NapätôK, Naleraq siunnersuutaanut soqutiginaartumut qujanaq.

Nunarsuarmi tamarmi sukkatsikkaluttuinnartumik ineriartorfiusumi nunatsinni innuttaasut ilinniarluarsimallutillu qaammaasaqarluartuunissaat Siumup pingaartilluinnarpaa, tassami Naalakkersuinikkut, niuernikkut teknikikkullu ineriartornermi, nunattalu nunanik allanik suleqateqarnerani, ilinniarluarsimassuseq pingaaruteqaraluttuinnartumik inissisimammat.

Tuluit oqaasii takornartat oqaasiini ilinniarneqarsinnaasuni sallinngortinneqarnissaat Siumup anguniagaraa, pilersikkumallugit inuiaqatigiit nunarsuarmioqataasut unammillersinnaasumik ilinniartitseriaaseqarlutik.

Namminersornerulerneq 1979-mi eqqunneqarmat ilaatigut danskit oqaasiisa sukumiisumik ilinniartitsissutigineqartarnissaat allassimavoq, 2009-milu namminersorneq pillugu inatsit eqqunneqarmat kalaallisut oqaatsitta pisortatigoortumik nunatsinni oqaasiunerat naqissuserneqarluni. Taamaakkaluartoq meeqqat atuarfiini ilinniartitseriaaseq pillugu inatsimmi danskit oqaasii kalaallit oqaasii naligalugit ilinniartitsissutigineqarnissaat allaqqavoq, tamannalu nalimmassaavigineqarnissaa Siumumit kissaatigaarput, ullutsinni inissisimanitsinnut naleqqussarneqarluni.

Siumumit isumaqarpugut meerartatta maanna attaveqaasersuutit atorlugit nunarsuarmioqatigiinni oqaatsit atulersimasaat eqqarsaatigalugit alloriarnissamut tullermut ikaarsaariartornissaq pakkersimaarneqaannarsinnaajunnaartoq, taamaattumillu tuluit oqaasiisa atorneqaleraluttuinnarnerat ilutigalugu meerartattalu piginnaasaannut ilinniartitseriaatsit



nalimmassarniarlugit ilinniutinik tuluit oqaasiinik atuisunik pissarsinissamut ilaatigummi aamma sipaarutaasinnaasunik aningaasaliinissamik ujartuinissaq ammaakkusupparput, naak ullormiit ullormut danskit oqaasii atorlugit ilinniutit piujunnaarsinngikkaluarlugit ilapittuutissatut aallaqqaasiutigineqarsinnaallutik.

Puigussanngilarpullu ulloq manna tikillugu ilinniartitaanerput danskit oqaasii atorlugit annerusumik ingerlammat, taamaattumillu allannguiniarnermi ullumikkumut ilinniartitaanikkut aaqqissuussami ingiaqataasimasut ikaarsaariarnermi innarlerneqassanngimmata katataanatillu, taamaattumillu ikaarsaariarnerup isumatusaartumik pipallataanngitsumillu ingerlanissaa Siumumit pingaartipparput, erseqqissaatigerusupparpullu oqaatsit suugaluarpataluunniit nunarsuarmioqataanermi inuit akornanni attaveqaasersuutaammata pingaarutillit, taamaattumillu Siumumit oqaatigerusupparput imaanngimmat danskit oqaasii ajortut, imaattorliuna ullumikkut ineriartornitsinni nunarsuarmioqataanitsinnilu tuluit oqaasii tassaalersimasut annerusumik aamma piginnaasaqarfigisariaqakkavut.

Taamaattumik Naalakkersuisut allannguutissatut siunnersuutaat ilalerlugu periusissatut pilersaarummik suliaqarnermi soqutigisallit sapinngisamik siammasissumik peqataatinneqarnissat soorlu ilinniartitsisut, ilisimatuut ilinniartoqarfiillu pingaartipparput.

Ilinniartitaanermut ataatsimiititaliamut ingerlateqqinneqarnissaa innersuussutigaarput.

Lars Poulsen, Siumut